

Nakorsaatit pillugit Inatsisartut peqqussutaannit Namminersorlutik Oqartussat nalunaarutaat

Matumuuna nakorsaatit pillugit Inatsisartut peqqussutaat nr. 1, 12. maj 2005-imeersoq, Inatsisartut inatsisaat nr. 6, 1. juni 2006-imeersup malitsigisaanik allannguuteqartoq nalunaarutigineqarpoq.

Kapitali 1

Atuuffissaa

§ 1. Inatsisartut peqqussutaanni pineqarput nakorsaatit. Nakorsaatit pineqarput suulluunniit:

- 1) inunni uumasunilu nappaatit katsorsarnissaannut pitsaaliornissaannulluunniit atorneqarsinnaasutut ilisaritinneqartut, imaluunniit
- 2) inunnut uumasunulluunniit atorneqarsinnaasut imaluunniit tunniunneqarsinnaasut nakorsaatitortitsinikkut, tunillatsitsinaveersaarnikkut imaluunniit timip inuussutissaminik suliarinninneranut sunniuteqartitsinikkut timip pigisaasa atuutileqqitsinneqarnissaat, allanngortinnissaat sunniuteqarfiginissaalluunniit, imaluunniit nappaammik suussusersinissaq siunertaralugit.

Imm. 2. Peqqussummi pineqanngillat:

- 1) Uumasunut akiuussutissat serummillu.
- 2) Inuussutissiat inuulluarniutillu, uumasunut nerukkaatissat, nerisanut nerukkaatissanullu tapertat, ilanngullugit vitaminit mineralpræparatillu kiisalu nioqqutissiat kusassaanissaq kisiat siuneraralugu amqip qaavatigut atugassiat.

Imm. 3. Inatsisartut peqqussutaanni aporfissaqartinneqanngilaq qallunaat nunallu allamiut illersornissatigut issimaaffisa, umiarsuit sorsuutit sakkutuullu silaannakkut angallataasa sakkutooqarnikkut pilersuiffiit aqqutigalugit nakorsaatinik tamakkiisumik pilersorneqarsinnaanerat.

Kapitali 2

Qitiusumik nakorsaatileriffik Nakorsaatillu pillugit ataatsimiititaliaq

§ 2. Qitiusumik nakorsaatileriffik Naalakkersuisut pilersittussaavaat. Qitiusumik nakorsaatileriffik Nakorsaatit pillugit ataatsimiititaliamut allatsitut suliaassanik § 3 naapertorlugu sullissisuussaaq, nakorsaatinullu tunngasut ineriartortinneqarnerat malinnaaffigissallugu.

Imm. 2. Naalakkersuisut qitiusumik nakorsaatileriffik allaffissornikkut suliaassanik annertunerusunik suliakkersorsinnaavaat.

§ 3. Nakorsaatit pillugit ataatsimiititaliaq Naalakkersuisunit pilersinneqassaaq, taanna nakorsamik siulittaasoqassaaq, ilaasortallu sinneri toqqarneqassapput peqqinnissaqarfimmi nakorsanut, peqqissaasunut, nakorsaatinut tunngasunut, allaffissornermut aningaasaqarniarnermullu pissutsit tunngasut ilisimasaqarfigineqarnissaasa qulakkeerneqarnissaat eqqarsaatigalugit. Nakorsaatit pillugit ataatsimiititaliaq nakorsaatit pillugit apeqqutini Naalakkersuisunut siunnersuisassaaq.

Imm. 2. Nakorsaatit pillugit ataatsimiititaliap aammattaaq suliassarai:

- 1) § 7, imm. 1, naapertorlugu nakorsaatit inatsisitigut akuerisaasut allattorsimaffliornissaat.
- 2) Nakorsaatit assigiinngitsut pigineqartut pisariillisarnissaat nakorsaatinillu atuinerup annikillisarnissaa, katsorsaanerup ajunnginnerpaajunissaa, aningaasaqarneq, isumannaatsuunissaa katsorsaasarnermilu ileqqut eqqarsaatigiitigalugit.
- 3) Nakorsaatit atorlugit katsorsaasarnerup pisariitsuunissaanut tunngaviusut qulakkeernissaat, tassunga ilanngullugit nakorsaatinik passussinerup atuinerullu qularnaatsuunissaat aningaasartuutillu sapinngisamik annikitsuutinniarnissaat.
- 4) Nakorsaatinik atuineq nappaatillu ineriartornerat malinnaaffigissallugit.
- 5) Nakorsaatit passunneqartarneranni innersuussisarnermilu pitsaassutsip qulakkeernissaanut peqataanissaaq.

Imm. 3. Nakorsaatit pillugit ataatsimiititaliaq nakorsaatit passunneqarnerat, sunut atortussaanerat atuinerlu pillugit Naalakkersuisunut siunnersuuteqarlutillu saaffiginnissinnaapput.

Imm. 4. Nakorsaatit pillugit ataatsimiititaliaq piffissap sivikitsup ingerlanerani ataatsimiissinnaanngippat Nakorsaatit pillugit ataatsimiititaliap siulittaasua Nakorsaatit pillugit ataatsimiititaliaq sinnerlugu aalajangiisinnaavoq, suliamik ilisimasallit attuumassuteqartut siunersioreernerisa kingorna tamanna pisinnaalluni.

Imm. 5. Nakorsaatit pillugit ataatsimiititaliap katitigaanera suliassaalu pillugit Naalakkersuisut erseqqinnerusunik maleruagassaliussapput.

§ 4. Nakorsaatit pillugit ataatsimiititaliap nakorsaatit pillugit najoqqutassiaq tamakkiisooq elektroniskiusumik naqitanngorlugulu ingerlaavartumik tamanut saqqummiuttarpaa.

Imm. 2. Nakorsaatit pillugit ataatsimiititaliap pasitsaappagu najoqqutassiatut allattukkani nikingasoqartoq, Nunatta nakorsaataasivia imaluunniit inniminniisooq nassuiaataasumik oqaaseqaateqaqquneqarsinnaapput.

Kapitali 3

Nakorsaatit

Nalinginnaasumik

§ 5. Nakorsaatinik passussineq imatut paasineqassaaq nakorsaatinik assartuineq, tigusineq, uninngasuuteqarneq, poortueqqinneq, puulersuineq tunniussinerlu. Nakorsaasersuineq taamatut oqarnermut ilaatinneqanngilaq.

Imm. 2. Nakorsaatinik pissarsiniarneq passussinerlu pillugit malittarisassanik erseqqinnerusunik Naalakkersuisut aalajangersaasinnaapput.

§ 6. Nakorsaatit taamaallaat nakorsanit, uumasut nakorsaannit imaluunniit nakorsaasiortunit Nakorsaatit pillugit ataatsimiititaliamut nakorsaasiortumut siumut nalunaaruteqareernikkut aammalu nioqqusiassap nalunaarutigineqareerneratigut sanaartorneqarsinnaapput. Tamatuma peqatigisaanik nakorsat nakorsaasiortullu sanaartorneq Peqqinnissakkut Nakkutilliisoqarfimmut nalunaarutigissavaat.

Imm. 2. Inuit imm. 1-imi taaneqartut saniatigut suliffeqarfiit allalluunniit nakorsaatinik aalajangersimasunik sanaartornissaannut Nakorsaatit pillugit ataatsimiititaliap inassuteqarneratigut Naalakkersuisut akuersissuteqarsinnaapput.

Imm. 3. Imm. 1 naapertorlugu nalunaaruteqarnissamut iliuusissanik aammalu imm. 2 malillugu aalajangersimasunik nakorsaasiornissamut akuerineqarnissamut qinnuteqaatit aamma akuersissutit nalunaarutiginissaat pillugit Naalakkersuisut malittarisassanik erseqqinnerusunik aalajangersaasinnaapput.

§ 7. Nakorsaat inatsisitigut akuerisaasutut isigineqassaaq Nakorsaatit pillugit ataatsimiititaliap nakorsaatit allattorsimaffisa uku arlaannut ilanngutereerpagu:

- 1) Nakorsaatit innersuussutigineqartussaasut nalunaarutigineqartussaasullu (allattorsimaffik A).
- 2) Nakorsaatit innersuussutigineqartussaasut (allattorsimaffik B).
- 3) Nakorsaatit pisiassat (allattorsimaffik H).

Imm. 2. Nakorsaatit allattorsimaffii minnerpaamik qaammammut ataasiarluni iluarsaanneqartassapput tamanullu saqqummiunneqarlutik peqqinnissaqarfiup nittartagaani.

Imm. 3. Nakorsaatit, imm. 1, naapertorlugu nakorsaatit inatsisitigut akuerisaasutut akuerineqanngitsut Nakorsaatit pillugit ataatsimiititaliaq akuersissuteqaqqaartinnagu:

- 1) Eqqunneqarsinnaanngillat, anninneqarsinnaanngillat, nioqqutigineqarsinnaanngillat, agguanneqarsinnaanngillat allatigulluunniit kaaviiartinneqalersinnaanngillat.
- 2) Passunneqarsinnaanngillat.
- 3) Innersuussutigineqarsinnaanngillat allatigulluunniit inunnik uumasunilluunniit nakorsaanermi nappaatillu suussusersiornerini atorineqassanngillat.

§ 8. Nakorsaatip sunniuteqarnerata, ilakutaqarnerata imaluunniit pissutsit allat pingaaruteqartut nioqqusiap allagartaanit allaanerunerat akuersaarneqarsinnaasumik tunngavissaqartumik pasineqarpat § 7, imm. 1-imi nakorsaatit allattorsimaffini ilaatinneqartunik Nakorsaatit pillugit ataatsimiititaliaq inerteqquteqarsinnaavoq. Tassunga atatillugu nakorsaatip taassuma erseqqinnerusumik innersuussineq malillugu peerneqarnissaa, tunniunneqarnissaa suujunnaarsinneqarnissaaluunniit Nakorsaatit pillugit ataatsimiititaliamut peqqussutigineqarsinnaavoq.

§ 9. § 7, imm. 1 naapertorlugu nakorsaatit akuerisaasut taamaallaat Nunatta nakorsaataasivia aqqutigalugu eqqunneqarsinnaapput, taamaattorli takuuk § 10 imm. 1 aamma 2.

Imm. 2. Inuit suliffeqarfilluunniit nunami maani nakorsaatinut toqqortaatinut akisussaasut nakorsaatinik pisiortorfimmiit toqqaannartumik nakorsaatinik pissarsiniarnissaannut Nakorsaataasivinnut nuna tamakkerlugu qullersap akuersissuteqarfigisinnava. Nakorsaatit pillugit inatsimmi malittarisassat pissarsiniartumit malinneqarsimannginnerinik tunngavissaqartumik pasinnittoqarpat akuersissut utertinneqarsinnaavoq.

Imm. 3. Imm. 2 naapertorlugu akuersissummik Nakorsaataasivinnut nuna tamakkerlugu qullersap

akuersissummik itigartitsinera imaluunniit utertitsinera Naalakkersuisunut suliaassanngortinneqarsinnaavoq.

§ 10. Nappaatip nakorsarneqarnissaa pitsaaliornissaaluunniit siunertaralugu nammineq atugassanik akuerisaasumik pigilersimasanik inuit nunamut isernerminni nakorsaatinik nassarsinnaapput. Annertussusaasa najugaqarnissap sivilissusissaatut naatsorsuutigisami atugassatut naatsorsuutiginisat sinnersimassanngilaat, sivilunerpaamilli qaammatini pingasuni atugassaassallutik.

Imm. 2. Nakorsaatit innersuussutigineqartussaasut nalunaarutigineqartussaasullu allattuiffianni A-mi ilanngunneqarsimasunik nakorsaatinik eqqussinermi taamaallaat najugaqarnissap sivilissusissaatut naatsorsuutigisami atugassatut annertutigisut eqqunneqarsinnaapput, sivilunerpaamilli ulluni 30-ni atugassat. Aammattaaq nunamut isernermi uppersaammik nassartoqassaaq, nunami najugaqarfimmi oqartussamit piginnaatitaasumit tunniunneqarsimasumik imaluunniit uppersarneqarsimasumik, angalasullu nakorsaatinik pisariaqartitsineranik uppersaasumik.

Imm. 3. Nakorsaatinik inuit eqqussisinnaaneratt annissisinnaanerallu pillugit Naalakkersuisut erseqqinnerusunik malittarisassalorsinnaapput.

§ 11. Peqqinnissaqarfimmi sulisut allatulluunniit nakorsaatinik eqqussuinissamut, passussinissamut imaluunniit tunniussisinnaanermut akuersissutaateqartut nakorsaatinik atuinnermi, matuma ataani akiuussutissaliinnermi, ilakutaritinneqartut siunertaanngitsumillu pisut Naalakkersuisunut nalunaarutiginnissaannut pisussaapput.

Imm. 2. Paasisutissat imm. 1 naapertorlugu nalunaarutigineqartut Naalakkersuisut Naalagaaffeqatigiinnerup iluani nunaniluunniit allani oqartussaasunut allanut ingerlateqqissinnaavaat, inunnik ajoqusertoqarnissaa pitsaaliorniarlugu pisariaqartutut nalilerneqarpat.

Imm. 3. Imm. 1 naapertorlugu nalunaartussaataaneq pillugu Naalakkersuisut erseqqinnerusunik maleruagassalorsinnaapput.

Nakorsaatit pisiassat

§ 12. Nakorsaatit pisiassat paasineqassapput tassaasut nakorsaatinut allattuiffimmi H-mi allattorneqarsimasut.

§ 13. Nakorsaatit pisiassat tuniniarneqarsinnaallutillu tunniunneqarsinnaapput taamaallaat:

- 1) Peqqinnissaqarfimmit.
- 2) Uumasut nakorsaannit ingerlatsinermik iluanni nakorsaatinik passussinissaminnut akuersissutaateqartunit.
- 3) Inunnit peqqinnissamik suliaqartunit namminersortunit ingerlatsinermik iluanni nakorsaatinik passussinissaminnut akuersissutaateqartunit.
- 4) Niuertarfinnit nakorsaatinik pisiassanik tuniniaanissamut passussinissamullu akuersissutaateqartunit.

Imm. 2. Niuertarfinni nioqutissanik assigiingitsunik ikinerpaamik peqarnissaq kiisalu akuersissutaateqarnermut akitsuutit pillugit imm. 1, nr. 4 naapertorlugu akuersissutinik tunniussisinnaaneq utertitsisinnaanerlu pillugit Naalakkersuisut malittarisassanik erseqqinnerusunik aalangersaasinnaapput.

§ 14. Nakorsaatit pisiassat taamaallaat tuniniarneqarsinnaapput tunniunneqarsinnaallutilluunniit nakorsaatip akui, atorneqarnissaa, sunniutai, ilakutai ilisimaneqartut, annertussusiliineq inassutigineqartoq, toqqorsimaneqarnissaalu pillugit kalaallisut qallunaatullu paasissutissiisumik puuanut ikisamik allagartaqartillugit. Allagartaq nakorsaatip puuanut ikisaaq nakorsaammut ilanngullugu puuani matoqqasumiitillugu imaluunniit nakorsaammut aalajangersorluarneqarsimatillugu tunniunneqassaaq.

Imm. 2. Puuanut ikisaaq allagartaq Nakorsaatit pillugit ataatsimiititaliamut tusarniaareernikkut Nunatta nakorsaataasivianit akuerineqarsimassaaq.

Nakorsaatit innersuussutigineqartussaasut

§ 15. Nakorsaatit innersuussutigineqartussaasut paasineqassapput tassaasut nakorsaatit akuerisaasut tamarmik nakorsaatitut pisiassaanngitsut.

§ 16. Nakorsaatinik innersuussutigineqartussaasunik tunniussisinnaatitaapput taamaallaat inuit akuersissutaateqarfimmik iluani peqqinnissamik suliaqartut uumasullu nakorsaat.

Imm. 2. Nakorsaatit innersuussutigineqartussaataasut tunniussisinnaasuunngitsumit napparsimasumut taamaallaat tunniunneqarsinnaatitaapput aatsaat nakorsaatissanut allagartami imaluunniit nakorsaatit tunniunneqarnissaannut allagartaliussami tamanna eqqortumik uppersarsarneqarsimappat.

Imm. 3. Nakorsaatissanut allagartat aamma nakorsaatit tunniunneqarnissaannut allagartaliuttakkat pillugit Naalakkersuisut erseqqinnerusunik malittarisassaliorsinnaapput.

§ 17. Nakorsaatinut innersuussutigineqartussaasunut nalunaarutigineqartussaasunullu allattuiffimmi A-mi ilanngunneqarsimasunik nakorsaatinik atuineq malittarisassat Naalakkersuisunit aalajangersarneqarsimasut malillugit nalunaarutigineqartussaavoq.

Uumasunut nakorsaatit

§ 18. Uumasunut nakorsaatinik, matuma ataani nerukkaatissanik aamma nerukkaatissanut tapinik hormonalinnik imaluunniit nakorsaatinik allanik akulinnik tunniussinissaaq aatsaat pisinnaavoq uumasut nakorsaata innersuussineratigut, taamaattoq takuuk imm. 2.

Imm. 2. Nakorsaqaarfimmi nakorsaaq uumasut nakorsaata suliassaanik ingerlataqarpat uumasunut nakorsaatinik tunniussineq nakorsap innersuussineratigut pisinnaavoq.

Imm. 3. Uumasunut nakorsaatit, matuma ataani tigumminnikkallartarnissami piffissat nakkutilliisarnissallu Naalakkersuisut erseqqinnerusunik malittarisassaliuussinnaavaat.

Kapitali 4

Nakorsaatit pillugit pilerisaarineq

§ 19. § 7 naapertorlugu Kalaallit Nunaani nakorsaatit akuerisaasumik nioqqutigineqarsinnaasut tunniunneqarsinnaasulluunniit kisiisa pillugit pilerisaarisoqarsinnaavoq.

Imm. 2. Nakorsaatit pisiassat kiisalu illersuutissanik akiuussutissaliinerit pitsaaliuinerillu pillugit

ussassaarinerit Naalakkersuisunit akuerineqartut kisiisa pillugit tamanut ammasumik pilerisaarisoqarsinnaavoq.

§ 20. Nakorsaatit pillugit pilerisaarineq tamakkiisumik pineqartumullu tunngalluinnartumik pissaaq. Pilerisaarut uukapaatitsisuussanngilaq nakorsaatillu piginnaasaanik ingasattajaarissanani.

§ 21. Nioqqutissiat allat nakorsaataanngitsut inuit uumasulluunniit nappaataasa katsorsarnissaannut pinaveersaartinneqarnissaannulluunniit naleqquttutut tamanut ammasumik toqqaannartumik toqqaannanngitsumilluunniit ussassaarutigineqaqqusaanngillat.

Imm. 2. Nioqqutissiat allat nakorsaataanngitsut imm. 1-imi taaneqartutut sunniuttarnerat pillugu pisuni immikkut ittuni akuersissuteqarnikkut pilerisaarutigineqarsinnaanerit Naalakkersuisunit malittarisassaliuunneqarsinnaavoq.

§ 22. Peqqussut manna naapertorlugu pilerisaaruteqarnermut atatillugu pilerisaarisarneq tuniniaasarnerlu pillugit inatsisiliat allat aammattaaq maluginiarneqassapput.

Imm. 2. Nakorsaatit, matuma ataani nakkutiginninnissat nakkutilliisarnissallu ilanngullugit pillugit pilerisaarinissamut Naalakkersuisut erseqqinnerusunik malittarisassaliorsinnaapput.

Kapitali 5

Aalajangersakkat allat

Nakorsaatit pillugit kisitsisitigut takussutissiat

§ 23. Peqqinnissaqarfiup nakorsaatinik atuinera pillugu kisitsisitigut paasissutissanik Nakorsaataasivinnut nuna tamakkerlugu qullersaq ukiumoortumik suliaqartassaaq. Tamanna pillugu Naalakkersuisut erseqqinnerusunik malittarisassaliorsinnaapput.

Pineqaatissiinerit nakkutilliinerlu

§ 24. § 6, imm. 1, § 7, imm. 3, § 9, imm. 1, § 10, imm. 1 aamma 2, § 13, imm. 1, § 14, imm. 1, § 16, imm. 1 aamma 2, § 18, imm. 1, § 19, imm. 1 aamma 2, § 20 aamma § 21, imm. 1, naapertorlugit aalajangersakkanik unioqqutitsinerit pillugit akiliisitsisoqarsinnaavoq. § 8-p nassatarisaanik peqqusissummik inerteqqummilluunniit naapertuutsitsinnginneq akiliisitsinertaqarsinnaavoq.

Imm. 2. § 8 aamma § 9, imm. 1, naapertorlugit aalajangersakkanik unioqqutitsinikkut nakorsaatit pineqartut arsaarinnissutigineqarsinnaapput.

Imm. 3. Imm. 1-imi ilanngunneqartunik unioqqutitsinerit, aktieselskabimit, anpartsselskabimit, andelsselskabimit assigisaannilluunniit unioqqutitsinerit ingerlatitsivimmut akiliisitsissutaasinnaapput. Namminersornerullutik Oqartussanit, kommunemit imaluunniit kommunalbestyrelsit, nunaqarfinni aqutsisut il.il. pillugit inatsisartut inatsisaanni § 64-imi ilaatinneqartunit kommunet ataatsimoorussaannit unioqqutitsinerusimappat Namminersornerullutik Oqartussanut, kommunalbestyrelsimut imaluunniit kommunet ataatsimoorussaannut akiliisitsissutaasinnaavoq.

Imm. 4. Peqqussut manna naapertorlugu najoqqutassiani unioqqutitsinernut akiliisitsinissamik arsaarinninnissamillu qanoq iliuuseqartoqarnissaa aalajangersarneqarsinnaavoq.

Imm. 5. Najoqqutassiani peqqussut manna naapertorlugu sananeqartuni aktieselskabip, anpartsselskabip, andelsselskabip assigisaasaluunniit unioqqutitsinerisa akiliisitaanermik pineqaatissinneqarsinnaanerit pillugu maleruagassiortoqarsinnaavoq. Aammattaaq kommunalbestyrelset, nunaqarfinni aqutsisut il.il. pillugit inatsisartut inatsisaanni § 64-imi pineqartut pillugit Namminersornerullutik Oqartussat, kommunip kommunilunniit ataatsimoorussat unioqqutitsinerisa akiliisitaanermik pineqaatissinneqartarnissaat pillugu maleruagassanik aalajangersaasoqarsinnaavoq.

§ 25. Nakkutilliinerit, uppernarsaasussaatitaanerit, inunnillu suliffeqarfinnillu nakorsaatinik passussisinnaatitaasunik nakkutilliinerit pillugit maleruagassanik erseqqinnerusunik Naalakkersuisut aalajangersaasinnaapput.

Imm. 2. Kalaallit Nunannut nakorsaatinik eqquusuineq pillugu § 9, nakorsaatit pisiassat tuniniarneqarsinnaallutillu tunniunneqarsinnaasut pillugit § 13, imm. 1, allagartat nakorsaatip puuanut ikisat pillugit § 14, imm. 1 aamma § 13, imm. 2 naapertorlugu aalajangersakkat naapertorlugit nakorsaatit isumannaatsuunissaat eqqarsaatigalugu Nakorsaataasivinnut nuna tamakkerlugu qullersaasoq pisariaqartumik nakkutilliisinnaavoq. Nakorsaataasivinnut nuna tamakkerlugu qullersaq piginnaatinneqarpoq eqqartuussivimmit akuersinertaqanngitsumik nakorsaataasivinnut, pisiniarfiit initaannut assigisaannullu isernissamut, nakorsaatinik uninngasuutinik takuniaajartorluni misissuiartorlunilu. Aalajangersimasunik peqqussuteqarnissamut inerteqquteqarnissamullu maleruagassanik Naalakkersuisut aammattaaq aalajangersaasinnaapput.

Imm. 3. Uumasut nakorsaattut pisortaasoq, uumasunut nakorsaatit pillugit § 18, imm. 1-2 aamma § 18, imm. 3 naapertorlugu aalajangersakkat naapertorlugit inuussutissat isumannaatsuunissaat uumasullu atugarissaarnissaat eqqarsaatigalugit pisariaqartumik nakkutilliisinnaavoq. Uumasut nakorsaattut pisortaasoq piginnaatinneqarpoq eqqartuussivimmit akuersinertaqanngitsumik nakorsaataasivinnut, illuutinit inuussutissarsiutigalugu uumasuteqarfinnut assigisaannullu isernissamut, nakorsaatinik uninngasuutinik uumasuutinillu takuniaannissamut misissuinissamullu. Aalajangersimasunik peqqussuteqarnissamut inerteqquteqarnissamullu maleruagassanik Naalakkersuisut aammattaaq aalajangersaasinnaapput.

Imm. 4. § 6, imm. 1, § 7, imm. 3, § 16, imm. 1 aamma 2, kiisalu §§ 19-21 naapertorlugit aalajangersakkat eqqutinneqarnissaat Peqqinnissakkut Nakkutilliisoqarfiup nakkutigaa.

Atortuulernerani atorunnaarsitsinermilu aalajangersakkat

§ 26. Inatsisartut peqqussutaat manna 1. januar 2006 atortuulissaaq.

Imm. 2. Atortuulernerata peqatigisaanik makku atorunnaarsinneqarput:

- 1) Nakorsaatit pillugit inatsit nr. 327 26. juni 1975-imeersoq.
- 2) Nakorsaataarniarfinnik ingerlatsineq pillugu inatsit nr. 209 11. juni 1954-imeersoq.
- 3) Nersutaatit nappaataat pillugit inatsimmi nr. 814-imi 21. december 1988-imeersumi § 40 (nakorsaatit pillugit inatsit), kunngip peqqussutaatigut nr. 858-ikkut 18. december 1991-imeersukkut atortuullersinneqartoq.

4) Nakorsaataarniarfinnik ingerlatsineq pillugu inatsimmi § 11, kunngip peqqussutaatigut nr. 12-ikkut 9. januar 1980-imeersukkut atortuulersinneqartoq.

Nakorsaatit pillugit Inatsisartut peqqussutaata allanngortinnissaanut Inatsisartut peqqussutaat nr. 6, 1. juni 2006-imeersoq (Nakorsaatit pillugit ataatsimiititaliap ingerlaavartumik nakorsaatinik akuerinnittarnissaanut periarfissaliissoq)^[i] atortuulersitsinerup aalajangersakkanik tullinnguuttunik imaqarpoq.

§ 2

Inatsisartut peqqussutaat atuutilerpoq ulloq 1. juli 2006. Atortuulersitsinerup peqatigisaanik nakorsaatit inatsisitigut akuerisaasut pillugit nalunaarut nr. 22, 14. november 2005-imeersoq atorunnaarsinneqarpoq.

Peqqissutsimut Naalakkersuisoqarfik, ulloq 20. september 2023

Nike Berthelsen (atsior.)

Naalakkersuisoqarfimmi pisortaq

/ Hans Erik Dahl (atsior.)

^[i] Inatsimmut allannguutit ukununga tunngapput: § 3, imm. 2, § 3, imm. 4, § 7, § 8, § 24, imm. 1 aamma 2, § 25, imm. 4.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut